

四庫全書

集部

欽定四庫全書

集部

弇州續稿卷

六十一

許校官編修<sub>臣</sub>潘庭筠

中書<sub>臣</sub>劉源溥覆勘

總校官進士<sub>臣</sub>楊懋珩

校對官編修<sub>臣</sub>王坦修

謄錄監生<sub>臣</sub>王錫壽

欽定四庫全書

弇州續稿卷六十

明 王世貞 撰

文部

記

越溪莊圖記

自胥門之江西南數里而至橫塘所謂越來溪也其水則益清兩岬饒淨綠與柔藍映帶不三里而抵石湖湖

口長橋綰之所謂行春橋也其右則為普陀巖有石梁之勝自此而取道至楞伽山橋之左迂迴可數百步有喬木榆柳之屬溝水灣環清泚桑圃數畝蔽其陰而王子玄靜之莊据其陽一衡門自西入稍東折而南為舍三楹客至可以茶又進之舍亦三楹而稍寬潔可以酒其又進而小東偏則為亭可以憩折而西傍為書屋可以宿亭與書屋皆修竹數千竿環之亡論寒暑雨月往往助其勝而最後因地勢成小圃雜樹三之雜花果二

之大堤樊其背高二十尺而時長莫知紀極不石而巖  
不甃而垣記云隋越公素所築新郭睥睨也其樹木大  
皆數拱餘竹益茂蘿薜灌莽鬱然深山家矣今年五月  
初余偶過之主人戴華陽巾輕紗裕出肅客焚香淪新  
茗已大為酒酒我果取之樹筍取之竹蔬取之畦茭蒲  
取之渚而細鱗長鬚之腴取之湖醉於亭金波煜然而  
苦碎夢於室玉聲鏗然而時警晨起而浴浴竟而飯相  
與要之後圃散步竹木間雉雉粥粥如喚二練雀雪潔

鮮俊可念往來透人眉睫稍上大堤凝眺久之則平湖之為鏡諸溪之為練近而寶積茶磨以及楞伽儼在吾几案蒼翠可仰掇遠而穹窿峯萼敷茹鄧尉之屬亦時與雲氣相出沒矣觴十餘行乃出步行春橋四顧若有會者蓋垂別而不忍舍而客有張子茂賢妙丹青余因指而謂之曰與玄靜居而隔垞者非吳王夫差之所謂郊臺也耶其稍左而鄰者非紫微舍人之所謂精舍也耶夫夫也而今安在哉且以吾吳之勝地非不足而其通

者迫於市囂之屬耳而市人子之接跡其勝而遠者車馬急而供張易竭能離而又能兼之者獨有茲湖而已玄靜幸得焉而吾與子幸寓目焉烏可使泯泯如前所謂也夫山水之與人交相待者也人不得山水亡以暢山水不得人無以著而廣於是張子欣然為貌之而余紀其事玄靜之父履吉先生者以文章名德靖間其草堂手所創而玄靜為葺治之垂五十年矣樹日益古而花竹日益新三徑日益闢其待山水者耶能為山水待

者耶

安氏西林記

余與仲俱嗜名山水而家東海瀉鹵地亡當者家有園頗見稱說遊客亦以近廛市且不能得自然巖壑以為恨而念數年前孝豐吳樞季嘗為余言無錫安氏園之勝蓋即今西林云安氏為錫最甲族其居東離邑二十里而羸邸里之雄沈與晦井饒沃亡論埒國封然不以豪故廢林野之趣北之膠山二里而羸即山址得園二



其上割山而半籠之今太學懋卿蓋時栖處其右方自  
懋卿之時栖處而園益勝破石根則神瀆湧疏磴道則  
幽穴顯斬惡木則嘉楠出列棘以為藩藩嚴而中靚深  
分流以自環環多而相映絡其臺榭可以巧承態其戶  
牖可以奇取睨其泉可以釀果茹蔬蔬可以羹魚鼈蝦  
蟹可以飫客而懋卿故有客癖客之以文事名者又雅  
慕懋卿以故爭麋集焉山人葉茂長甫客之雄也今年  
自錢唐倦游還訪懋卿倒屣揖之入載酒崇肴或凭鹿

車或鼓漁刀相與窮晝夜為娛樂時秋氣鮮霽雲初解  
駁山若迫而邇水若媚而密禽魚若傲而尔汝我懋卿  
之愛托於酒而猶未已則謀與茂長謀所以寵靈之益  
釐而為景者三十又二景各有詩茂長之為體九而懋  
卿之為體僅一顧其風調旨象大約有足當者懋卿具  
其事貽書友人王世貞俾為記世貞迺復約其所謂三  
十二景而得其尤勝者諸臺館亭榭之類凡麗於山事  
者五麗於水事者十四魚所麗者三曰蘭巖者畛之衡

縱巖也。大國之香滋焉。曰風絃障者，高坪直上接於膠。下瞰諸水，長松冠之。風至則調調刁刁鳴，故曰風絃也。曰遁谷者，降膠而凹却入水深佳處也。曰晨光塢者，膠之逶迤而左右抱林者也。以左小缺得岵夷候，獨早故曰晨光也。曰纖纖泉者，穴於膠最冽而分甘，所謂可以釀者也。然於茗尤發香而益色，是山事也。曰鏡潭者，諸流之所匯也。其受纖纖且既皎而澄，可以燭須眉，故曰鏡也。曰鳧嶼者，水中最大洲也。羣鳧鷺屬玉而族焉。曰

上島者嶼之右別島也曰中洲者嶼之輔洲也曰蕭閣者於嶼長松匝之曰空香閣者於島竹木叢之曰景榭者緣潭而立得月則水中之樓閣皆可頻而有曰一葦渡者以渡鳧嶼名曰夕霽亭者以晞髮於頽陽名曰素波亭者渡口綰也曰息磯者可憩而息者也曰醉石者可藉而醉者也是皆得之水故曰水事也曰虛籟堂以遲賓者也中空於緒颺巨所不納故名曰椒庭者廣除也可以眺山椒曰爽臺者踞椒庭而聳梧竹承之是不

盡麗山水者也然而山水之致襲焉故曰兼所麗也其  
曰西林則以大士閣在焉懋卿之所寓皈以其異日與  
遠公埒者也凡山居者恒恨於水水居者恒恨於山山  
水居者或陋且瘠而不可以園適於目者不得志於足  
適於足者不得志於四體適於四體者不得志於口是  
四者具矣而多不得志於人與文懋卿之西林俛得之  
哉嗟乎豪而為袁廣漢石季倫司馬文孝王末矣以洛  
陽之履道里與李文叔紀類極清曠適爾雅鷗適之觀

彼其於李文叔之洛陽名園前所云五者亡論第不再  
易世而辱於屠酤市販之手又久之求其跡而不可得  
豈非以其近屢故豪者好之狎而易為有俗者嫉之接  
而輕相躡耶懋卿乃能酌遠邇劑喧僻而加力茲林不  
侈不陋人無所用其欲惡而伸其狂吾因知茲林之長  
為安氏物哉吾於文劇喜柳柳州愚溪愚谷鉅鉅潭潭  
西小丘諸記於詩喜吾家右丞輞川諸絕夢寐之所注  
像其勝鬱淳猶宿眉宇間弟仲近歸自秦叩所謂輞川

者云彷彿有之不甚可指辨而李願使君前按柳頗毀  
柳之溪谷潭丘以為不能當其文然則懋卿與茂長之  
詩行後世其不以西林為輞川愚溪者幾希游西林而  
得其實其不以二子賢於右丞柳州者幾希余竊欣有  
托焉

### 石亭山居記

環陽羨而四郭之外無非山水其山之冠則皆青峭鬱  
麗其中則宛轉深窅而其下則多嵌空玲瓏其水之為

湖若溪若汶者皆泓渟清泚可濯纓而鑒髮山水之所  
交蔭則皆沃埜有稻禾薺茗美箭柿栗之屬而又為寓  
公騷人之所咨賞若蘇長公輩詠歌而志識之不一以  
故環陽羨而四郭之外亦無非甲墅名圃嘉靖中邑之  
賢大夫吳先生強棄其印綬歸而邑邑於郭居之不快  
行求地至城南之五里得一故墅而樂之問其田與賦  
則皆中下錯也曰吾且以為孫氏之寢丘乎傍有一小  
山曰石亭其高與延袤皆不能里計質之人某已氏之



所棄可損絳籠而有也乃益置廳宇治丙舍為涼榭煖  
閣庖廂浴室之屬雜蒔名卉翼以松柏篁竹相土之宜  
以滋果蓏旁畝益拓粳秫參之瀦流以為魚防闢塲以  
為雞豚栖曰吾宮於是飲食於是其美猶可以沃賓客  
也暇則扶藜杖躡蠟屐而登所謂石亭者則銅官離墨  
荆漢二九上下之勝一望而既之曰是不必皆吾有也  
庶幾哉不皆吾目有乎當大夫之樂之甚至捐館舍而  
即其陰卜兆以歸焉時二孺子方襁褓其家之不遑恤

而獨所謂石城之居賢者以為甘棠而黠者果以為寢丘蓋久之而二子漸成立補太學上舍錄鄉書則其居益飭日麗而家老之任農圃者日益勤即毋論其田賦視公時亦改而上中矣伯子與余仲氏善謁余而屬記之伯子之言曰是居也吾先大夫之所手樹築者也吾方惴惴焉懼五畝之不能保以貽地下羞而今故無恙吾偕吾仲時息焉游焉且獲取其美以供先壠之粢盛而傍及賓客則大幸雖然薛公有言玄孫之孫為何人

不能知也夫以不能不圯之廬不能不凋之卉木而責之所不可知之人吾又安能保其終為誰有也其泯然而斲盡者無可恃所恃獨巋然石亭之山而已叩之而頑然不能自名然則所恃以久而使後世之人詢所謂石亭山者曰其傍固先詰吳大夫之墅也以等於蘭亭午橋足矣唯子一言記之耳余听然而笑曰孝哉子之言雖然恃余記而不朽亦迂矣固不若子之石亭山頑然者足恃矣吳大夫諱仕以文行顯嘗三拜學使者而

三棄之學士稱為願山先生

太倉諸園小記

吾州城睥睨得十八里視他邑頗鉅闌闔之外三垂皆  
饒隙地而自吾伯仲之為三園餘復有八園郭外二之  
廢者二之其可游者僅四園而已今世貴富家往往藏  
鋸至巨萬而匿其名不肯問居第有居第者不復能問  
園而間有一問園者亦多以潤屋之久溢而及之獨余  
癖迂計必先園而後居第以為居第足以適吾體而不

能適吾耳目其便私之一身及子孫而不及人又園之  
勝在喬木而木未易喬非若棟宇之材可以朝暮而  
夕具也於是余弇園最先成最名為勝而天下之癖迂  
亦無不歸之余者余記余園因次第記之田氏園者蓋  
鎮海衛千戶田某所築也去居第衛左穿一弄而東百  
步有隙地而壘石為丘高不過尋丈餘廣袤什之太湖  
石僅數峰亦非佳者亭館橋洞之屬具體而已顧獨有  
大樹十餘章美蔭婆娑而池水亦渺瀰垂柳環之可汎

然不曉為舟始某以嘉靖癸未山成而其子叅將生故名之曰應山後積戰功至大官其橐累數千金歸而好陸博俠游又以訾謀復用敗因游貴竹成都之帥幕皆不遇狼狽歸其園今鬻之大司馬凌公所謂匿其名者也故不復脩治所謂大樹者亦幾盡安氏園者在州之震方最僻而雅前阻小溪水溪外為廛市其右與其陰皆稻田農懽歷歷在耳目左通一門而入除竹為逕數十武得一室下踞橋之折而南北宛宛復為脩逕藩其

右以圃皆種梅桃杏李林檎之屬中有亭一茅舍一其北逕盡稍西為蓮花池水亭據之中為門以入則前堂後閣東榮之書室及庖廡皆在焉園之主人曰邦者罷江右之司訓歸則日夜課園丁種植溉壅不休以故花之事獨先其果蔬足自給而竹亦獨蔚茂甲於他園主人年八十矣猶時時杖屨攝客然好面折人人畏之而嗣子仁能具家釀盤飧最名豐腆客之黠者給主人入臥因盤薄竟日夕

王氏園者元馭宗伯所治也始其大人封詹事公闢地於宅之後東西可三百餘尺南北三之三其陽為菜畦蓋皆潘河陽賦中所執也畦盡限以脩垣竇而入十餘武則橫隔大池一橋蜿蜒其上循橋而得逕其右方為亭亭之上為榭明瓦覆之朱欄四周亭前壘石成小島蓋沼灩灩其下有襄陽人者能於石鰓引機作水戲亦足供嗚喙左方池稍廣前堂五楹後廊楹如之種牡丹多至三百本菊之倍者再蓋詹事公父子他無所好顧獨



好花於花獨好菊牡丹花時馳價募購亡論近遠而姻  
黨家有奇本往往輒以贈公大合樂高宴酬之時積歲  
累殆不可指屈公捐館後元馭痛不忍料理當非復舊  
觀矣二花外多名種佳果而其最奇者曰蘋婆曰麝香  
紅李壽星桃

楊氏日涉園故都督尚英所築也詳具余弇山稿蓋園  
成之四載而都督卒其子指揮之慶不能守遂以峰石  
售之人地今悉歸崇明郁氏有竹木蔬果轉盛而亡游

者

吳氏園者在州南之稍東最為闌闌而園屏居第後地不能五畝屈曲呼門由左方而入一樓當之前為方沼溝於樓之下以通後池水樓不甚高廣而頗敞麗啟西竇而出則可以步武巖嶺曲折上下有亭有臺皆具體而微山之陰華堂面之山之右層樓頽之堂之左平池浸之中為曲橋以度東泝亦有亭冠其阜後始稍稍見萊竹竹盡而園之事窮矣大抵樓高於山牆高於樓不

令內外有所騁目而又嚴其鎬無敢闖而入者至於櫟  
棟之華煥供張之都美酒食之腆潔非士大夫與所親  
狎莫能與也主人為太學雲朞其祖父以貲傾州邑然  
不曉有客至雲朞始稍知客又好酒而文其園最晚成  
而最整麗雖於山林之致微然亦差不俗矣

李氏園吾師觀察公所有也在南門外度津橋稍東枕  
濠水有軒一樓一皆絕庋小惟中匯大池若方鏡亭於  
中央橋通之軒四隅皆藝牡丹其右方一臺四隅亦皆

藝牡丹有紅於猩血者白於于闐玉者紫於萼而香者  
其大若盆盎高至尺許而玉樓春一株特出牆表數之  
可得二百朵觀察公惟不食酒然花時召客以大白汎  
之必令醉而後已蓋觀察之子穎好種花於牡丹為獨  
精故能致其盛如此詹事欲悉力雄勝之不能也園中  
側柏一株奇秀甚尤諸圃所無世父麋塲涇園雄麗始  
為吳地冠捐館後為吾伯氏所狼籍幾不可游吾季氏  
嘗乞余言記之以志不忘而已後余治中弇石從而徙

然僅十七耳今之土岡溪池竹柏猶有存者以余記攷之或得其髣髴也

曹氏杜家橋園者鄉進士茂來所治也去城北五里得之杜氏故尚襲之其地多喬木森然而古長夏之際虬龍舞空赤日不下脩竹千挺蒼翠交暎一池澄泓水亭踞其上中疊石若三山者今皆去之層閣丙舍可居可游可以讀書其城市非遠非近沽酒買魚不至淹客茂來性好治園墅在吾州城者一故居沙頭者二甫成得

少時息則厭而它徙晚節築舍於玄墓不勝其寂徙築  
虎丘與所知一二人讀書吹笛繕性而已杜家橋園子  
孫時肄業其中春時亦有載酒游者餘三園多蕪而沙  
頭一園大池數畝種魚魚巨而肥玉蘭木穉株可數圍  
高出堂表余欲游之不果今以為恨

余治鄖時所部近洛陽頗加詢訪今郡城僅得四分之  
一所見惟公署廨舍而已城外亦有土圃十數種牡丹  
芍藥二水既改徙而遠亦僅涓涓於李文叔所記夾池

脩竹之勝無一存者然賴茲記而至今吐生色人讀之  
尚猶有欲振屐而從者吾州諸園培塿耳眎吾郡故不  
能十一三歲不墾則牧地矣然則茲記其可以已哉

### 離資園記

出鸛鵲橋東第之左門不五步而渠其水僅踰尋然宛  
宛通官河橋踞之臨橋而門榜曰離資園園故里人  
朱氏之茱壤也東西不能十餘丈南北三之入門為蟠  
松二方竹十餘莖最南有亭曰壺隱其三方皆梅可二

十樹前疊石為山頗盛沼蓄朱魚其中山之延袤僅可  
以丈計而中有澗有洞有嶺有梁皆具體而微碧梧數  
株駸駸欲干雲其右方為書室二楹其左方種竹千餘  
竿露翠風簧時時琴酒適竹間有亭曰晞髮以憩客步  
壺隱之後得小圃二皆有欄竹藩之桃杏木藥海棠山  
礬之屬寓焉圖畫而逕見為廣除孤峰出為洞庭石嵌  
空玲瓏色青黑而右有錦川斧劈輔之復有老梅玉蝶  
綠萼各一植左右大可蔭臺臨臺而屋凡五楹中榜曰



鷄適軒狀其卑小也亦以志自得也左室可讀書以得  
竹故署曰碧浪右室可棲客曰小憩軒之後為重軒臨  
後池擬種白蓮百本榜曰芙蓉沼沼後距牆咫尺而近亦  
有夭桃紫薇垂柳以覆之度小憩室折而西北為側樓  
三楹臨渠而傍階其前庖庖浴室也始余待罪青州以  
家難歸竄處故井公除之後數數虞盜窺徙而入城不  
勝闐闐之囂煩乃請於太夫人以創茲園問寢之暇輒  
攜吾仲氏徙倚其間三四友生叅之濁酒一壺束書數

卷佐以脯炙間以諧謔不自知其畧之易戾也園土狹而瘠獠奴頗率職溉壅三之芟薙五之以故嘉木名卉出而不能容惡艸因讀屈氏騷得離資二語取以名之夫資菴菴所謂草之惡者也屈氏離而弗服乃女嬃呻呻而詈之何哉謂其有所別擇也夫余方柱下漆園之是師而敢有所藉於屈氏哉第諸名大夫士人不以余鄙而時過從又不以茲園鄙而辱之詩歌若李于鱗徐子與彭孔嘉皇甫子循輩為人者三十而羸為古近體

者四十而奇凡兩卷皆滿錢叔寶尤子求各為之圖而  
王祿之周公瑕又各以小篆題額噫嘻為茲園者亦幸  
矣余再解鄖節日棲息弇州山池與茲園若避者月不  
能再至偶曝書得此卷因追為一記以志余之非有惡  
於蕢而無所托於離也不然即諸名大夫士人憐而詩  
歌之女嬭而在復呻呻詈余矣或者曰不然子之園固  
未有蕢也子何以蕢之而復離之而又復名之子不亦  
贅哉而又何女嬭之恠余亡以應

澹圃記

澹圃者吾弟敬美之所手創也敬美自秦臬予告歸若  
蹙額於闌闌者而不能遠余而放於麋鹿魚蝦之地念  
欲栖離簞則太湫而狎囂栖弇山則大麗而賈客皆厭  
之行募地得城隅之坤維其南望恬憺觀三百武而近  
北去弇山半里而遙三方皆遠市右方雖小邇而特荒  
落亡貿易歌哭聲傍多沃埜稍遠為鄉人墅饒嘉木美  
箭之屬敬美大樂之曰是可居也復以屬蒼頭政母若

而治弇治如弇弗繼也且弗汝功政頷之蓋不易歲而  
圃翼然矣畝殺於弇六之一方廣實隄之前門鑿池半  
規衡可二百赤縱不及衡者過半藩以石欄其赤視衡  
木故而喬新植叅之清蔭森然其右濬長溝可四百赤  
抵圃之北不盡者五十赤高榆外植佐以叢篠自然儲  
胥入門則莽蒼若廣莫不榮不階築之馮馮以為收穫  
塲耳軒三楹踞焉僅脫茨而已扁之曰學稼敬美每至  
耕時則先其家衆行課耕坐池上課婦子挈壺榼而餉

作勞者已取其餘酒食與余暨兒子輩噉之聽吳歌甚樂也當穫時坐學稼軒其餉作勞與余輩噉餘酒食聽吳歌如餉耕而加樂曰亦足以酬老農矣左廡啟雙扃而入精廬凡四重重各五楹抵樓而止輔以丙舍及倉庾庖廩之屬高庫廣狹與人意適養雞牧豕酤酪不乏間攜婦以止曰異日為兒曹作一蝸殼者也右廡如其左啟扃呀然而寥廓平臺之前為小池壘石因之以滋牡丹紆徊下上其萼畢見中為堂雖僅三楹而極軒敞

宜暑無所不受涼中設石屏几榻琴書觴奕之類整靜  
就理名之曰明志取諸葛武侯語也蓋亦名圃意也後  
枕大池與學稼軒共之而稍限以一隄隄植雜果樹鳧  
鷺鵝鵝時時所托趾亦一觀也堂之右折而南為書室  
三楹以居兒輩牡丹之所不盡者亦托植焉其北渡小  
平橋入一門武康石高四尺餘絕類中山雪浪差黑耳  
中為靖以奉觀自在及朱真君香火循左廊折而北為  
小軒中除疊數峰皆靈壁英石奇峭百狀鬣而澤可鑑

也又折而東穿水閣尤麗三方皆池菡萏千柄媚色幽  
芬逗人眼鼻間繇水閣而北稍西復得一軒尋復過曇  
陽靖折而西得煖室者二雪洞者一浴屋者一皆小而  
精中多貯三代彝鼎孤桐浮玉大令名墨中散酒鎗之  
類敬美恒以暇日焚香蕭散其間臥起師意殊適也蓋  
至中平橋剝琢絕矣繇東後小軒傍啟短垣而出是為  
複道脩篁夾之蜿蜒而北高者出屋杪下者如澗壑風  
日獻伎琮琤青蔥大抵皆傍池池半而橫橋出以通東



果園橋長可七十赤廣五之一每至落照時暝色浮動  
碧蘆紅蓼自有漸無人語雞聲斷續於煙景間徙倚以  
待東鏡之吐潛潁入波鎔金四注驚鱗時響纖玉騰躍  
夜分愈閒寂四顧泱泱無際呼酒數行領之却憶吳興  
於碧浪湖子夜燒魚擣苳風物不異覺彼猶為一二  
釣艇所窺不若此橋之更適也果園尤曠所種皆柑橘  
棖緣桃李來禽櫻胡枇杷名品又以其隙分畦栽藝紫  
茄白芥甘瓜櫻栗之屬余嘗戲謂阿敬汝生計大佳不

若汝兄慙弇園皆骨山不堪食耳花品繁至不可計而  
於鞠尤盛其種以數十計花時移盎明志堂皆滿本以  
數百計牡丹雖小簡亦埒之自橋返竹逕復折而北更  
渡一橋稍東則崇臺巋然雕甍朱楯輔以紫薇之籬紅  
藥之圃蓋一陟而圃之事無餘又可以旁得麗譙琳宇  
大抵據圃之勝者池能盡池之勝者橋能盡圃之勝者  
臺敬美以為老於是三者足矣第總而名之曰澹圃元  
美乃悠然而歎曰吾師乎吾師乎大雄氏得之而為禪

悅道家者流得之而為天人糧儒者得之而為玄酒大羹今夫五色之有玄也五音之有雅也皆是澹也然而獨歸之味者舌之所入根深且也與身之所饗際一也天下之稱為穠者必與澹對吾美其穠而受之既受而思焉未有不厭者知其所以不厭而後有真得則是澹也始基之矣或曰不然也吾嘗游是圃矣秋水涸天根露百草辭青萬葉謝條所覩惟一點靈蕭瑟之區而已以此思澹澹或歸之時至而羣匠舒雜英獻木藥叢鞠

之淫巧爭組於吾目醇醲鮮脆與客共之便房曲廊宛  
轉深靚邃古之物遙裔之珍不移而具澹安從至哉元  
美曰不然子之言俟境而後澹者也夫俟境而後澹者  
非真澹也敬美甫升而未嘗一日不與余偕余故勉自  
割尚於世味時時染指焉敬美則知足少欲自天性矣  
再出而小離我歸而復就我扣之而所謂知足少欲如  
故也故其宦兩都歷名藩握蘭建禮尚璽承明褰帷江  
右秉鐸闕中未嘗一日不以身受循吏規然而若固有

者銀黃之組一辭而去之再辭而不就然而若固無者  
皆澹也是故敬美之署澹圃也以澹圃者也非以圃澹  
者也或又曰美哉子之言雖然不俟境而澹乎則何以  
不離資之湫弇山之麗而必是圃擇哉吾聞之道之出  
口澹乎其無味子誠知澹者其叙致胡藻而抗辨一胡  
詳也於是元美乃不言而第以澹與敬美共之終身

約圃記

無住館之西北偏得一竇穿而出可十餘武軒三楹翼

然前為中庭庭有臺悉時木芍藥其左右隅皆種竹數  
百箇枕軒之後者池東西橫亘渺渺扁其軒曰媚清取  
康樂綠篠媚清漣語也遂東穿竹逕垂二十武而庭有  
老梅數樹軒承之凡三楹中楹正受梅當花時目境與  
鼻觀競新扁之曰玉鱗取李羣玉玉鱗寂寂飛斜月語  
也然羣玉之目以花落若敗龍之鱗而余所取梅既已  
老如鐵虬挈攬而花綴之為若鱗又若玉者左楹逼於  
逕右楹則稍寬而復為三小楹中度之為兒騏讀書所

向背就池為明晦寬者支榻陋者容膝亦各自有名復  
循而東轉小嶺皆種竹及梅桃度平橋復西則梅桃益  
盛海棠杏間之復有軒三楹不扉不窻其前亦臨池扁  
之曰適我取靖節適我無非親語也後贅一楹闢周除  
其背雜蒔花草夏木陰陰時禽弄聲騏坐其中甚憚也  
扁之曰欣托亦取靖節衆鳥欣有托語也更穿而西得  
一丘正與媚清軒對登丘而望則三隅之煙樹矗矗如  
青螺者不可指數扁之曰煙鬟取昌黎擢玉紆煙鬟語

也丘之後皆植竹東西之為赤者垂二百南北四之一而圃事窮始余故居自燕寢之後為家人舍為厠廁為積薪聚為養雞牧豕之場而以父故蕪廢不治家人亦不堪其地它徙而甌脫之兒騏乃稍稍除去瓦礫剪荆棘樹卉木因匯以為池餘土以為丘餘材以為軒若室而總名之曰約圃騏之言曰始吾父之治圃而稱弇山以泉石奇麗甲郡國不勝涉而厭之仲父之治澹圃名為澹耳而實宏壇饒名材卉今吾圃之廣袤不能當其



十一足不待疲而竟目不待瞬而息執役不二丁葺費  
不傾橐以此名約蓋真約也而吾意常優然而有餘語  
有之為學日益為道日損益者之謂博損者之為約也  
約也而失之者鮮矣吾且奉以終身余听然而笑曰有  
是哉雖然猶有待也以汝仲父之澹而澹吾弇山不為  
豔也以汝之約而約汝仲父圃不為廣也夫有待者境  
也無待者天也夫芥子也而納須彌所謂無待者也此  
其為約也大矣吾將示汝以境乎抑示汝以天乎汝其

識之

弇州續稿卷六十

欽定四庫全書

弇州續稿卷六十一

明 王世貞 撰

文部

記

陽湖別墅圖記

甌之山自西來沿江而下其一枝入於江斷而復起若  
珠連者曰九斗山郡城據之其一枝自朱浦分亦西行

可數里為二小枝折而南凡東西與二總名曰暘輿輿之水自西南來者曰雄溪瞿溪郭溪為里四十而遙南山折之匯而平為湖曰暘湖當暘湖之前突起兩峰其高逼漢峰頂有臺曰吹臺或云其先子晉吹笙地也亦名吹笙臺暘輿之東麓則吾大叅王公陽德別墅在焉其三垂皆山吹臺前聳俯臨湖湖之中宛然而洲者曰浮碧墅之後清泉懸崖下瀾瀾入溪環堂而流坐其中若齋舫焉曰湛然堂堂之後迂徑而東有軒焉叢甌之

異卉木于庭曰衆芳軒又東有樓焉以當山色初暘承  
之松竹如沐曰青旭樓軒之後脩竹將萬挺循竹而西  
北有徑四曰四時其卉木如其時公為諸生未幾而薦  
於鄉一再屈南宮即不出隱而讀書其間甚適峰上碧  
千仞而湖下碧千畝朝暮之異態晴晦之異狀寒暑之  
異姿皆悠然與公會而公亦悠然會之得其流峙之旨  
以成吾德得其潛植之用以成吾材得其風行露潤之  
華以成吾文章蓋業益就而公不得久為湖山有矣公

為備兵使者以功晉今官猶治兵事經略之暇時時過  
余山園輒停盼久之一日慨謂余曰以吾墅之壯不能  
望子園然吾墅無待而子園有待者也雖然昔子有園  
而無主吾時時能代若主今子園有主矣而吾墅未有  
主也吾將歸矣其主吾墅矣余笑曰公欲歸天子  
其即歸公耶以余之為時厭也與公之不能厭時也皆  
理也抑昔賢有言居廊廟而不忘江湖彼豈謂其遽能  
江湖耶姑寓其所以不忘者毋使廊廟勝之而已矣公

听然悟曰善乃命黃生為之圖而屬余記于首

暘湖別墅後記

諸稱名山者得水則雄諸稱名園墅者得山水則亦雄而園墅之雄尤不可兼得都會之地王侯貴人足以號集財力而苦於山水之不能兼山而顛水而涯肥遯幽貞之士樂棲焉而苦於財力之不易兼以是有兩相羨而已余之治三弁其地雖非大都會然差亦易辦而其不能兼山水則如之余不愛其財力以鑿深而壘危初

若以為小兼者而終不能得其真永嘉王陽德先生昔者駐節於吾州每過余弇輒徒倚竟暮不忍去一日忽慨焉而歎曰仁知之樂則子庶幾哉雖然猶有待者也以不穀而幸生永嘉清華之所會又幸而有無待者在問其地則曰暘湖之別墅既而曰惜哉不穀之未究吾思也今者見子之弇而有遺憾焉謂黃彪貌其大都以屬余曰子姑為我記之余乃粗述二奧之勝所自來與奧之分水而為雄瞿郭三溪南山折之合而為暘湖因



東與之行據湖之勝而為墅墅之中環清流而為堂者  
一叢羣卉而為軒者一承初陽沐松柏而為樓者一其  
大較如是而已而復設隱報先生曰先生試觀乎茲無  
待者以此而當我弇可也我有待者然無適而非公所  
貌也先生唯唯尋用量移去吾州天子下璽書歸大鎮  
先生而先生不肯出乃者介曹生子念而書謂余賴子  
之庇天賜不穀以日不穀有完力而從事茲墅以不穀  
墅而求子記語不得也以子記而求不穀墅不得也請

重為子言之。暘湖之中有洲焉。故有臺而無橋。臺亦草創而已。覽之如崇飾之名。之浮碧志適也。左跨石橋。若渴猊而達吾墅。名之曰聯璧志。吾兄弟也。吾墅面南湖。嚮吹臺峰。其高刺天。樹石坊焉。榜之曰湖山會秀志。大觀也。坊前後外松柏槐柳皆合抱。中門三楹。翼然署之。曰暘湖別墅志。吾居也。入門循龍尾道而上。得堂取康樂語曰清暉堂。左有閣登之而四山之色若綰帶。曰紆青。皆志吾外境也。閣稍東數十武而得靜室曰潛光志。

吾內境也折而東短垣竇之啟扃而呀然得荷池四畝而羸夏秋時紅白萬柄清香襲人亭半侵之曰暑香清暉之右趾得方沼畝而羸錦鱗百頭相狎且適軒據之曰知樂循軒而北得圃五畝而羸名花百千種與嵐紫翠相奪曰聚秀水涓涓流花間可以浮觴沿圃為渠沿渠多樹桃李曰桃李溪篠千挺半之得亭曰漣漪蓋清泉自屋杪下無所不受其匯而池而沼流而渠若珪若璧若罄玦者皆是也至園而墅以內之事始既既出墅

翼墅而門其左者曰迎晞右者曰含景其陽為隄千赤以限湖波甃石固之桃李芙蓉相錯曰錦浪隄盡隄而東得佛廬負小山而面湖曰寶界庵折而北得一嶺叢桂覆之曰金粟嶺自嶺冒詰曲而上數百步曰穿雲峽出峽轉而南最高處得喬松數百株攬其杪臺之而重湖連阜之秀一目而盡曰超覽自臺降稍北得脩竹數千竿其其中館之曰筠阿出筠數十武轉深而古木壽藤曲翳之曰綠沈坳轉而西流泉之所注得方池曰停

玉沼沼水自石瀨濺濺而下小澗以環清暉堂之右蜿蜒若虹曰臥虹澗度臥虹之西小橋得石臺踞水而竹復翳之西日不下湖風時來於暑益快曰清涼界稍折而北復得一塢多種古苔梅臺其最受香處曰香雪塢至塢而墅以外之事始既其他山田數十畝當墅後青烏法按之可以菟裘其東復為嶺高峰特秀兩山拱揖復按之可以立宮不穀且次第僦工矣子以為有待耶無待耶子為我重記之以為奚弇若余讀而色飛左顧

曹生曹生起而曰其然惟某獲侍先生杖屨一寓目焉  
臆余曩所記以先生嘗讀書茲墅得所謂流峙者以成  
其德所謂潛植者以成其材所謂風行露潤者以成其  
文章而後為世用今茲先生之用未盡究歸而出其完  
力以朝夕於茲墅宜其兼也夫不知者以為昔無待而  
今不免有待矣智者以為有待而竟無待也願先生時  
時坐潛光湛然之地一芥子亦無著間舒之而方寸者  
吞八九雲夢而曾不罣碍夫豈直此拳山勺水而已耶

曹生曰始子為記時謂當長有弇而以先生之不得遽有暘湖為異乃今先生有暘湖矣子厭弇而捐以付游者而束身於一團焦僅斗大事固難料如此請持此言而質之先生相與北向而大槩則子何如

天寧寺塔放光記

庚戌之春三月二十八日大人還自按楚以述楚事未即朝憩於城西郭天寧寺之方丈世貞時承乏秋官署得出侍焉其明日午飯於比丘間有談寺塔光者云間

歲或見之或數歲見之見必以夕夕必以晦大人顧世  
貞而哂亦不能復問至街鼓動甫粥畢微雨簌簌猶霧  
一沙彌入而諄曰光現矣世貞乃奉大人出至塔所塔  
可高三十尋四周綴鐸以萬計其聲恒鈐鈐鉤鉤亡論  
晝夜陰霽而至是忽盡斂乃它聲作於下籽籽然又類  
蛩鼓翼者仰睇相輪表青白光晶熒大於五斗甕上下  
閃歛不定間一射人衣亦作青白色可炊黍熟許時乃  
息則鐸聲發它籽籽聲亦息矣比丘乃前賀曰公父子



善智識哉是光也毋論諸寓公即吾儕見之不數數也  
其大不能斗細以為螢若燭者而又不獲久也今大矣  
而又且久公父子善智識哉大人復笑不應而又明日  
世貞乃稍筆之側理不知作何語後復與僧無心有談  
及之因追記其事按寺碑謂此宰堵波隋開皇中所建  
以藏舍利者也其寺曰天寧寺而志輿地者不復徵所  
繇起第云故名天王寺至我明正統七年而加營之乃  
錫以天寧名而已隋帝肇戚畹東國難倒提三尺之孺

子而竊其寶顧托育於尼智仙受舍利於阿羅漢而所謂舍利者初建塔於開皇之始載而其存者復騰瑞於仁壽之改元天下之福地寶林無不先後安置凡一百一十一州其最班班者并之開義汴之福廣蒲之西巖秦之靜念懷之仁壽華之思覺蒲之栖霞鄧之寧國許之鳳泉絳之覺成益之法聚蔣之栖霞鄧之寧國許之辨行慈之石窟江之東林蘇之虎丘趙之無際隋之智門冀之覺觀究之普樂徐之流溝鄭之定覺濟之法吼

京輦同荆之大興國與五嶽之以嶽名者當時慶雲甘  
雨靈芝瑰樹異禽馴獸靈蛇巨蜂之瑞在在有之而青  
赤五色光景浮動固懸合若契也其最盛者曰曹陝雖  
隋帝亦疑之以叩天竺摩竭提之使而云陝乃地藏道  
場曹為光華虛空藏故余往往私怪其事以為隋帝者  
何脩而臻此毋乃附響貢諛一國若狂獨孤顧指之諸  
髡倡之守臣和之奸助從而粉飾之哉乃今覩茲靈異  
抑何遠而章覈而不誣也且夫舍利者此云骨身又靈

骨也是骨髮肉之英而戒定慧之所薰脩也佛之所謂舍利者則非見劫積也是故三昧之燼得八斛四斗而不為多其三之一留人間者阿育王分之為八萬四千塔役鬼神一夕成之而不為速震旦得十九塔而不為少康僧會懇之則自無而忽為有曇榮懇之則自三粒而至三百粒今夫隋帝者非謂其德足感召也非謂能荷擔如來之玄理宏教也緣也道不緣不顯緣不時不契夫豈直隋帝緣至則姚興昏而諸譯興阿育殺而舍

利出則天淫而華嚴著緣未至則唐虞之為聖漢文光武之為賢而杳如也銀有燭壁有輝蛤有珠蜃有市蜃蜎有冰自無情而含識一物之微尚能斂天地之精以為光怪而況舍利乎哉或曰京師古幽州也隋帝之所建塔而藏舍利者幽之弘業也非天寧也是不然幽至於今無弘業也夫天寧之先不為弘業也意者志軼之志軼之安知弘業之不為天寧也耶

重修南翔寺記

去嘉定縣之南二十里而遙蓋有南翔寺云寺所以稱  
南翔者當梁天監間有異僧德齊止錫其地規為阿蘭  
若甫決策而雙鶴依之晨起放鶴鶴往之方必有客至  
至則為檀越布金其地委輸若神鬼不日而成上刹以  
雄麗冠東南德公化之亡幾鶴亦望南而翔不復返或  
云鶴之逝也留詩於刹之楣郡吏載焉以其俚或傳會  
寘弗錄垂五百年而為後唐之開成寺且圯矣復有異  
僧行齊者止錫如德公雙鶴復依之行公感其事為一

衆說法而有莫少卿者盡捐其素縉而拓飾之雄麗隄  
於舊觀行公戲謂鶴吾事畢矣恣汝所往鶴應聲盤舞  
遂亦望南而翔不復返行公尋亦化當是時震旦之士  
毋論緇白咸以二齊公為一身而後雙鶴之為前雙鶴  
其語留珠林中甚著至宋紹定中天子知之遂賜寺額  
曰南翔至元而講有堂禪有廬會食有所蓋以時次第  
新之及明正統中而大圯司空周忱氏過而慨之以邑  
賦之羨粟倡而諸善知識和焉其觀遂復故至嘉靖中

小圯則小飾而至萬厯初則益大圯上雨傍風飄搖其  
外蠹螳叢蝕其裏勢且及像像亦多損剝寺僧且重悲  
之憫之計無所出彷徨四顧而歎曰秉軒者源源且不  
乏而不一及鶴耶我則不德不能若二齊公何以使鶴  
今其地猶曰南翔而歛之公秉里士行賈不可指數能  
一慨然為莫少卿哉於是稍有應者若某某輩然不能  
十之一而諸歛中獨有一善知識為任良祐氏其貲金  
五千嘗汎大河而遇風以舟免歸德於河金龍之神而



捐千金之橐新其廟矣既而歎曰是神也尚不能不賴如來之力以脫大鳥喙而我敢忘所自挺身出任其費若木石即甃塋若塗塋若脂澤之類計可中金二千曰去吾橐之半不至凍餒妻子也逾月而以其貨賄器用來又逾月而以匠石工師及諸役作來日運指計身分功於其最下者蓋不及歲而大雄氏之宇煥然一新餘力以及門廡方丈而佛及菩薩阿羅漢天王諸像皆奕奕神采生動瞻者肅然僧自重等不勝感稽首來謁余

請為序次其事或謂寺創自梁天監天監之主不有所  
謂武帝者哉其初浮羅經像不可勝計普通大同之名  
震耀於異域而我初祖達摩直斥之為人天小果有漏  
之因彼二齊公者獨不之聞耶而今任氏復效之吾子  
固不自愛其筆札毋乃譎語以辱我初祖余竊不然夫  
童子聚沙之因至受鐵輪王位而及其既登阼也以摩  
訶力役鬼神一夜而成八萬四千塔徧於閻浮提而尚  
未證五地何者以難易之勢殊也武帝挾半天下之訾

而作此小有為事固易耳且其難不在有為而在無  
為無為之地不過識本來面目武帝不之悟而沾沾焉  
挾以為功德宜初祖之一斥而欲醒之也若必以初祖  
而律二齊公則徧閭浮提何所著大雄跡且令我大雄  
無一蓋頭茅而何以標像教於後世作人天眼也今夫  
任氏者徽賈人子耳徽俗以訾為命而獨弁髦之悉竭  
其精力從事於茲刹而不之卹即無論其為齊公化將  
無為莫少卿者化哉且夫樂界之有鶴非罪報所生又

焉知二鶴之一不為任氏而任氏之異日不為鶴勒那尊者也耶夫任氏者苟不住色而行布施則固初祖之所許而我大雄之深歎以為貧窮之難者也或人屈而退余故筆之以授自重使勒石以詔來者

泖塔院常住田記

泖故由拳國至秦廢而為長水縣俄忽陸沈而為湖曰泖泖之言谷水也蓋當秋霽時其水隱隱見睥睨坊市跡云而水之所不盡者僅周數百步唐時有比丘如海

過而異之以此金剛不壞之座諸天龍之所擁護者為  
窳堵波凡七層高可百赤以鎮之塔成而登則近而九  
峰遠而娜如峯嶸馬鞍之杪俯而陽城澱山諸湖之浸  
亡不入目皆其勝遂甲郡邑又八百年而比丘智明始  
益構大雄氏殿中塑佛菩薩羅漢聖僧像傍翼以淨室  
庖廡之屬智明既化去弟子自正乃悉捐其衣鉢與遊  
族姓所得者置大藏經五千四百餘卷為傑閣以度之  
閣成而塔院之事始全其地雖宛宛在水中央然獨為

諸流之所滙於道里甚便以故叅方之雋亡論大德具  
壽或閱藏者或事羯磨者或倦而借以安居者咸望表  
而憩楫焉自正二食屏除四事供養所至若歸毋煩分  
衛然而至者源源恒見其餘供者汲汲恒苦不足大善  
知識陸宗伯公樹聲憫之與其仲氏今中丞公樹德謀  
割腴產五十餘畝充院長住且言之邑司俾免其他徭  
役大約一歲之入少節縮之可以供入衆自正感二公  
之為德而慮周也其檀而波羅蜜也屬居士記之以垂

永永居士竊臆我薄伽梵之息竹林也身率其弟子以  
游食國城聚落而名之曰乞士又制令精舍毋得蓄釜  
鬻事火之物而名之曰律然一易世而迦葉阿難陀結  
集大衆成大藏五百六通迭察迭書無餘晷足以行乞  
勢不得不資阿闍世王之送供而其後三明五行之賢  
或却怨敵或摧外道人王至割邑戶以資之多有至千  
戶者少亦不下百戶蓋戶割而田亦偕焉遂為寺長住  
而我震旦如南嶽青原瀉仰諸山亦因而不改譬則井

降而陌繩降而契世之所趣便雖我薄伽梵亦不得不保也今天下伽藍蘭若亡慮數十萬計獨所謂長住田徃徃屬之豪有力家夫古今不相遠古之所施今之所奪而閩浙之間其猶有存者郡邑苛責之殆甚於齊民而其僧亦不自愛一從踐更歸施施而趣摩登廣額之家以苟快目前而已嗟夫大教之凌夷夫豈可盡歸之一闡提要亦有交任其責者今以宗伯公伯季之所捐尚不敢望吾家東亭右丞何論給孤獨長者然於末世



則甚希有故不辭而記之竊有進於二公曰不住相曰  
那爛陀又有進於諸受供者曰天台觀心法又有進於  
自正曰時念如來白毫相中一分居士亦借以小懺無  
明焉

前將軍漢壽亭侯關公廟記

故前將軍漢壽亭侯關公之祠廟徧天下幾與學宮浮  
屠埒而其在吾州太倉者亡慮十數而城西之巽隅最  
著其祀不知所繇始自癸丑甲寅間烏寇內訌擻髡我

郭郭而睥睨之間若有攝其魄而祛之者諸將吏士人  
歸德於公之神稍稍飾廟貌而病告瘳且前逼狹逕不  
稱萬厯之庚辰飭兵觀察使臨汾徐公來謁而心動謀  
所以更新之而會御史中丞絳州孫公按部至與徐公  
咨攷政弊吏民疾苦而徐公以間請新公祠孫公慨然  
許之已而曰時得無屈乎是未可以煩我父老子弟蒐  
幕府嘗得羨廩之中金百以倡察使者番禺曾公公喜  
亦出其羨廩金殺其三之二徐公所捐帑金視孫公而

倍以工屬袁守伯睿俾司其總而幕僚劉琚寔專之衛  
幕僚葛某佐之亡何徐公遷為秦右轄而觀察副使饒  
州李公來代有以不繼告者李公遂大捐其奉與廩以中  
金四百五十益之已郡守朱君益之得十之一而贏袁  
守益之得十之八而殺萬戶曹邦獻其地畝五諸僚佐  
文武吏士以暨州之冠衿耆碩効材力者糜至蓋踰歲  
而廟成前有門門有綽楔入復為門門之內為廣除宏  
愷朗洞左右兩廡翼然繪公之存歿履歷甚詳中堂巍

然穹窿靚深公之神與裨將之像在焉最後為寢制稍殺於堂兩廡稱之凡費中金千二百有奇工若干前是徐公以遷去而州之薦紳先生出為祖徐公觴而屬余曰夕者夢公戟手謝謂托子以寧宇疇歟為我紀之則稱先生名以報意欣然別有是哉公之神也非先生之言麗之石而誰屬余謝不敏廟既成袁守則率司記者道正費有光以李公命來請既李公復申徐公遺指以請余不獲重謝乃拜手颺言曰公自黔首起應募掃黃

巾若敗葉馘良梟德若承蜩縛禁若係鼠覆七軍若淹  
螳其跳盪摧拉之雄武夫人而能狀之間闕萬死跡故  
主於一錐莫立之地抗漢賊扶漢燼於一綫未盡之息  
其孤忠亮節夫人而能言之公之歿威靈著於遠邇卹  
大災捍大患與祀典膺合夫人而能頌之仰之獨公之  
神所以久且大者弗盡知也今夫吳相胥城陽景王至  
俠烈也吳興憤王至伉猛也伏臘刳醜之所趣覲巫之  
所揚相世史之所載記何班班赫赫也然不數百年而漸

以銷淪無遺響者激生於一念之發而氣用於一時之不盡也非精誠為之也傳不云乎至誠無息不息則久久則徵徵則悠遠悠遠則博厚而高明以麥城之役公穆然而就冥若無聞者垂五百年而始為開皇一顯於玉泉之刹而尚泯泯也又垂五百年而為崇寧再顯於蚩尤之戰而後著自是而又垂五百年公若以一身化億兆身而應天下天下以億兆心為一心而趣公其卹捍之靈與供奉之虔略相當蓋上而后王君公下而

紅女嬰孺近而都掖遠而魑結侏儸之鄉亡能不心儀  
公者公之所以久而大則誠也亡論其雄武即所謂孤  
忠亮節皆誠為之也誠可以貫金石後三光終始萬物  
而又何疑焉孫公徐公則皆公鄉人其知公寧在余下  
姑以余所臆識其大都云世稱公有曰義勇武安王者  
元所封也有曰西臺朗陵馘魔上將者道家符籙所傳  
也今定之曰漢前將軍漢壽亭侯廟曰將軍侯者何昭  
烈所命也我高皇帝所著令甲也係之漢何公志也李

公聞而曰善趣登石

性命仙篆七十二字記

元馭以我師曇陽子所授仙篆名三十六見示曰鵠頭  
曰大書曰小書曰地方曰蚪斗曰龍書曰麟書曰飛白  
曰刻符曰玉筋曰倒薤曰穗書曰墳書曰柳葉曰竹葉  
曰松書曰鐘鼎曰碧落曰垂露曰鳥跡曰金錯曰殳書  
曰龍爪曰垂雲曰芝英曰鳥書曰玄玄曰龜書曰鸞書  
曰採陽曰瓔珞曰剪刀曰懸針曰雕蟲曰轉宿曰含珠



世貞不自量妄以為生人大原母過性命度世之學亦  
母過性命擬借此二字竊窺我師筆端化工之妙師果  
不鄙而許之爛然滿紙捧持循覽不覺絕倒第以為怵  
心眩目之觀而已徐察之而其離合等配錯綜叅伍有  
不可形容其妙者真若乾坤清寧日月懸象星宿臚列  
而鼓以雷霆潤以風雨也師又為世貞作金字心經神  
采更自焯然而中有天圖採陽二書尤出諸體之上密  
以叩元馭謂師盡得集道宮崔姑仙篆凡七十二家頗

秘之不盡泄也世貞因徧考衡恒王融韋續王愔庾元  
綸韋仲謝善勛所著諸篆名稍合者志之鵠頭一曰鶴  
頭皆漢詔版所用稱尚書尺一者是也大小篆即大小  
書斯以前石鼓比干盤延陵墓之類也蚪斗即蚪斗之  
形而飾之或云顓頊高陽氏所製是也龍書太昊庖犧  
氏因景龍之瑞而作者也麟書魯西狩獲麟仲尼反袂  
拭面而泣弟子申以為素王之瑞也飛白蔡邕書石經  
鴻都門見小吏以帚墜壁感而作也刻符斯高用之以

題印鳳鳥頭而雲脚者也玉筋斯所作正體也倒薤亦名薤葉仙人務光所作也八穗神農氏因上黨嘉禾八穗而作也又曰嘉禾墳書用以書三墳者也柳葉諸志所不載今用以刻邊帥閣臣印其文尚存鐘鼎自禹而後凋戈鉤帶夏敦齊鏹之所存者也碧落乃絳州龍興宮碧落天尊像書也其字獨奇古為陳惟玉書一曰黃公譔書一曰二道士閉戶三日書成而化為白鴿飛去也垂露漢章帝時曹喜所著也鳥跡黃帝時蒼頡感

鳥跡而著曰金錯古用以銘錢周之象府漢之刀布文是也又書伯氏所執文記笏武記及其文也龍爪右軍偶然而作類龍爪也右軍疑行此則篆也垂雲或即雲書黃帝因卿雲而作也芝英六國創體以為符信者也鳥書周文感赤雀銜書以紀瑞也或曰武王赤鳥入室作也龜書他不載所始載惜志鸞書少昊金天氏紀官而作以章衣服也懸針亦曹喜所造以題五經篇目者也雕蟲一曰蟲書魯秋胡婦浣蠶而作者也轉宿宋司

馬以榮惑還舍而作也其不可攷者天圓地方採陽玄  
玄含珠竹葉松書而已豈天造草昧人文乍開上帝故  
遣顏禹諸真以書法救結繩之困耶抑顏禹輩皆仙真  
書成而以報上帝耶將赤明龍漢之後司仙史者頗而  
采人間之筆耶人非天不因天非人不成蓋自古記之  
矣獨念世貞以一么麼丁末造不揆斷碑靈簡坐而得  
覩歐趙所未覩之蹟其幸一也以楊司命之秀挺警效  
高玄而不能得天篆之一筆紫微王夫人所謂靈筆真

手不敢下交於肉人世貞肉人也何自而得之其幸二也真誥七卷多楊許手跡二君名位雖重而其時道尚未成所垂世者不過真行二種而已世貞乃獲收我師道成之筆其幸三也紫微夫人又謂五色初萌文章畫地之時則有三元羣方飛天之書又有八龍篆明光之章其後逮之皇世而演八會之文為龍鳳之章拘省雲篆之迹以為順形梵書分破二道壞真從易配別本支乃為六十四種之書也夫曰演曰拘省則八會從簡而

雲篆從繁或有出於我師七十二家之上者世貞異日  
倘獲沾刀圭之貺請次第授簡焉敬記此以俟

曇陽先師授道印上手跡記

余以庚辰二月造元馭宗伯報謝我仙師曇陽子已飯  
宗伯園邂逅今道印上人閱華嚴藏上人秀瞭豐下舒  
重如象王不輕言笑余乃稍以藏中語挑之輒響應而  
又輒破的當是時余竊自快以得上人而恨其晚上人  
亦欣然徒館弇山園元馭為傳致饗余三人相懽無間

也始余異上人貌以為河北僧父與語而後知其為吳中人然不謂余里人也久之上人乃自言錢姓錢故海濱名族嘗有室且家矣已而悉棄之而披剃師故伴松師時時習禪觀伴松余友也已遊金陵聽講華嚴經鈔於僧守愚已又游徑山聽講法華楞嚴諸經於僧東涵已又西北游止五臺少林二叢林者各若干夏請益於古燈二虎大方大千諸耆宿蓋宗教之學明而後歸余雖以好上人竊又疑上人事佛者也不當得仙師度亦



不當受度仙師而元馭手一編而授上人則為維摩經之下卷有仙師故及丹鉛之跡在焉復以傳燈錄一公案謂上人子姑若支公之繹莊氏以意作數十百語請得質之仙師余不揆亦作數十語附上人後仙師略余之闕而迫於啟上人也出一札大約謂如來三十二相皆從無相得無相莊嚴皆自無心作心靜神凝然後可以當空迸火紅如血次聞師子吼三聲纔得如來珠照破萬象森然無法不過余始惕如也既而復茫如也不

能與上人相徵復上人故名隆魁別號印實而先師為  
易名曰無心有易號曰道印名之篆玉筋則金填之號  
之篆蚪斗則綠填之仙師既羽化而所報札業已留余  
所上人乃乞元馭補書而後先所賜凡三札聯為卷以  
示余而俾記之札語夥不可悉其大要曰斷思想以養  
神遣妄念以保性曰死心全道絕學無為善惡平等不  
二法門曰近火先焦者是先天真火子陽盛陰衰泥裏  
有刺者是物從有情中生曰無則太虛天堂有則火宅

地獄曰泥水生蓮向上蓮蕊一一倒下莫不返本還鄉  
嗟乎是道體也是道機也是道用也余得三復焉而後  
知吾仙師之所以度上人與上人之所以得度不偶也  
教外別傳斯之謂已即上人鉢錫徧天下所叅禮龍象  
非一一匹之蛄蟻嘑鐵牛得一血飽耶夫衛元崇憤其  
教之不振顧甘心而徇道人因以倒戈北攻像教塗炭  
無論已若紫賢道光者自謂已入曹濟三昧一旦舍而  
從杏林以尋紫陽之脈何渠至改服受屢依貴勢采有

情卽長生之業就而無生不亦遠哉今我仙師以曇鸞  
仁者轉而薈二氏之精神以鼓鑄天下而上人超末法  
乘風緣若萍汎江湖而忽值之金篦指而甘露沐蓋不  
必髮若髡黃若緇不必捷椎擯而出世度世之妙於一  
蒲團得之不亦至幸至幸哉雖然余不佞嘗以寶仙師  
墨而見呵謂不尊心師而尊世師不究字理而究字  
跡之言也敢與上人交勗焉重謂曰上人而知印實之  
所以去實而道印乎而復知隆魁之所以無心有乎則

思過半矣

游白雲觀記

記佛光之明日大人有同倫之約於它刹者余以間信屨消搖於門顧童子六七連袂而過曰曷不一往禮鍾了髻乎余顧小隸而問鍾了髻何人也曰是道人也而年百有十四矣問何寓曰白雲觀觀去寺若干里曰里可五而遙於是小隸前嚮道余與二友人步隨之折而西已更折而北蛇行墟壠間下上故隍堞陟烏帽出沒

麥浪浮映少頃抵觀觀之中閨閉則從左竇而入為後  
殿有全真東華純陽諸像坐像稍剝蝕而傍室為鍾寢  
其人短而鰲髮強半白問其年曰不記也固叩之則曰  
吾生十三歲而有土木難依稀從長老說之也則百十  
四者信矣問何以壽則曰天可憐活爾許年吾無術也  
惟不娶不多飲不怒不識數耳余心服其語簡切匪妄  
第跡之所受蔬果薪米之類甚具皆大官供也蓋中貴  
人言之上而徵之耳已出啟前殿廓落中惟供長春丘

真人像像白皙然膚理皴皴無鬚寡眉若閤宦然攷故  
志丘公最為重陽王真人小弟子道成而青吉思帝聘  
至西城行在優之與講鈞禮呼丘神仙而不名仍詔天  
下之為全真教者皆隸焉即故太極宮宮之而加飾曰  
長春宮即茲觀也仍盡捐勝國上林太液之遺予丘丘  
老矣晨起治道家事畢呼果下騶從其徒數十尚羊山  
水間日映乃返蓋又三年而後卒卒之明年始以尸入  
龕葬於今像之下其徒云貌若生芬芳可數里不審其

信否當是時全真之教徧天下割張氏所謂正一之半而觀之瑰麗深靚危婉宮掖蓋與元相終始明興而其道始小屈以劉淵然之見崇焦奉真之為幻不能盡復其盛今縣官雖名慕稱之然雅旨乃在內外二家鍾恂恂一老耳語云臭狸何足汙吾絞者非耶或曰鍾僅九十餘其言百十四者諸貴人飾益之也

弇州續稿卷六十一



# 欽定四庫全書

集部

弇州續稿卷六十二

詳校官編修<sub>臣</sub>潘庭筠

中書<sub>臣</sub>劉源溥覆勘

總校官進士<sub>臣</sub>楊懋珩

校對官編修<sub>臣</sub>王坦修

謄錄監生<sub>臣</sub>王錫壽

謄錄監生<sub>臣</sub>王肯勵

欽定四庫全書

余州續稿卷六十二

明 王世貞 撰

文部

記

吳郡北寺重修九級浮屠記

原夫窳堵波之昉肇也如來示寂雙樹之間閣維不燼  
皆成舍利上而帝釋梵天下至拘尸摩竭咸構層刹以

示瞻依爰及弟子鶩子慶喜之倫雖等級小殊而供養  
臚次漢明之季則摩騰標幟於洛陽孫氏之初則康會  
著祥於江左古語所述經來白馬教盛赤烏殆非虛也  
當是時孫之乳母陳有宅於吳郡城之艮隅擬舍為寺  
而仲謀信心方熾大捐國帑以成厥功鬱作雄刹後有  
僧正慧者別創窳堵波十一層於殿之右方迨千餘載  
而不戒於火宋元豐中善信比丘及諸大檀越合謀新  
之且曰後分經載如來十三層辟支減二而因緣經則

謂如來八辟支七夫數窮於九九之可也蓋緒成而感  
舍利之瑞學士蘇軾以所藏古銅龜奉之而為之志自  
是稱壯觀者數十年未幾而邁金源之難復委之火紹  
興末頭陀大圓復一新之垂四百年而復不戒於火其  
上三層與中之幹柱蕩為煨燼搢紳大夫故嚴太保恪  
顧太僕存仁今錢司寇邦彥郭光祿仁輩感形家言發  
希有念將鼎新之而誓用不繼善信稀簡有山僧性月  
者清淨少欲精勤自勵六時飯命一鉢不私聞而慨然

請任其役延禮坐主朗公為一大衆開首楞嚴觀施雖  
微漸有至者甫謀樹架而工師驕焉故昂其直以相要  
苦有游僧曰南山如金者自伏牛來遶塔頂禮而歎性  
月故識之謹曰事濟矣請一切受署如金初無所難易  
架構之工十未二三即挺身木杪指揮羣役小間即為  
廣說因果辨辭泉湧或戟雙肘或翹一足猿跂鳥掛蹕  
厲若飛嘗一傾滑而墜衆謂立糜碎矣去地丈許蹙騰  
而上尋理舊談面不改色乃共咋指以為神人檀施雲

集如金復手自料理分功役作徃徃兼數人凡九閱歲而始成為工三萬餘為木石甃聖之費直金萬餘高三十七丈延袤二十八丈八尺雖九級之尊母改舊觀而壯麗多鉅儼然若攬化人之袪而造天中矣如金又能賈其餘力化造能仁丈六金像及圓通妙相慈氏應身種種悉備自是不能以其名隱而漕使者符攝俾主寶應湖隄緣如金意難之業已不可止遂示微疾而逝其徒之住持茲刹者追感無已俾居士記其略於堅珉居

士少嘗讀史至齊梁魏隋間見天下波靡於西竺之教  
盡發齊民之蓋藏而糜爛之金碧宇舍文繡土木疑其  
蕩而亡所節得達磨有漏小果之一語以為快然至梁  
武之末契折蘆渡江面壁嵩少魏之女主亦嘗再使問  
存當時永寧之刹上徹霄漢下窮黃泉吞若同泰者八  
九而未聞有所風止者何也蓋以實引冠達而以權聽  
胡媚也此所以待中智下根之異也破相盡於大鑒即  
心標自寂公風慧之士一時為之穎脫而百丈繼之別

樹法堂不立佛殿丹霞燒木像以禦寒玉泉書祖名於  
犢鼻乃至有畫撒諸佛投之水火而即師子坐設臯比  
者曰佛菩薩假名也西方假地也天堂地獄假設也今  
夫律者人之所不樂受也財者人之所不樂捐也非有  
甚畏於彼者未有能去而就此者也今天下之號為叢  
林者衆矣然往往創自六季及唐至宋若元而復者有  
之矣創者何寡也其在於今則毋論創而復也因而飾  
之者非宮掖之重則大璫醯賈耳於齊民何寡也非古



財力之獨易而今之獨艱也其權屈於實實之不足而  
權亦因以泯故也嗟乎冠達而前尊佛之跡而迷其心  
百丈而後得佛之心而絀其跡跡絀而心存此其重奚  
啻倍蓰然而能使佛之教日凌夷而不振者亦一濫觴  
也夫以吾郡之一窳堵波於佛事至猥小耳以如金之  
為幻而使人趣之苟有所就其功德亦至渺淺耳然使  
闡提之衆因而有所提策振怠而為警破悵而為施閭  
左之金錢粟帛不去而之狹斜改陸博游冶鬪訟之業

而皈善地者非亦末法之一助也耶諸公又為言郡以  
雄聞天下其勢盤紆若龍而茲宰堵波實為之尾前者  
災民為之謠曰龍無尾雨不起今茲大有利哉則非居  
士所與知也

小祇林藏經閣記

藏經閣在小祇林門之第三重其前頗梵生橋曰清涼  
界有高榆美箭之屬左右引植嘉樹碩果後揭中龕傍  
瞰西嶺下帶天鏡潭上組名卉和薰涼蟾媚景百態最

為吾園勝處詳第二記中不復贅始余得佛氏經一藏  
於華明伯所闕百之二乞善書者補之為茲閣以奉扁  
之曰藏經可十載而得道經一藏於沈氏子所亦闕百  
之一其補書亦如之附奉閣之右室

闕

藏經一而已

佛是也而何以稱道藏焉今夫道經之為聖言者獨道  
德黃庭陰符諸篇而已餘皆偽也或曰佛經之小乘諸  
品西僧為之也亦偽也或曰釋教之與道角其斷斷而  
貞勝者非一日矣漢之永平元魏之真君高齊之天保

宇文周之天和唐之會昌宋之宣和元之至元凡七角而釋三勝道亦三勝一兩敗蓋至于今未有合也而子乃今合之何也解之者曰釋日也道月也不可偏廢也雖然俱未曙余之所以合也曰虛曰空曰無曰寂其體同也曰知足少欲其初乘同也曰以定生慧以恬養智其功同也曰慈為大士德為三寶首而悲而哀其念同也如來說法四十九年曰無法可說而猶龍公則曰多言數窮不如守中其法門同也維摩之左掌擎阿閼界

而南華之鵬搏九萬里而風斯在下其倣儻之寓同也  
故道林開士精言罄於逍遙通明玄宗深尚托之勝力  
彼豈不知其水火然而不以奪其所真見者其見同也  
小不盡同者深淺大小之際而已彼其樹黨立幟而相  
搏擊所搏擊最膚跡也其所標著最膚言也皆其師之  
所不薦者也然則二藏之不相悖有之其亦可無刪乎  
曰吾於佛經而擬所存者十不能一也於道經而擬所  
存者百不能一也刪則吾惡乎敢志之而已矣

重修虞山白雀寺記

去常熟之二十里有寺曰白雀其地東枕虞山西沼大海襟江帶湖蓋羯磨之勝境也寺所以名白雀者長老云梁天監二年有遊僧志圓善堪輿家言得其地而悅之倡諸善智識以有茲刹刹甫構而白雀二巢焉自是數圯數振以迄於亡元之季委之兵燹之手歷我明八熙朝而弗克復其存者草莽之趾與僧雛之丙舍而已久之為正德丁卯比丘明慧以四衆力悉新而拓之又

久之為隆慶丁卯再圮優婆塞明淨再新之尋復圮而  
比丘智海乃歎曰嚮者六十年而圮今者不二十年而  
圮豈末教之轉促耶將無所以致力於土木者未固也  
謂其徒慧秀曰吾饒緣為汝職募若饒思力為吾職締  
自海公之募而檀施雲集秀公獲匠意焉覓取其厚材  
取其良塗墍取其精堅於是三身之座四天之閣與十  
六應真之位屹然若金剛不壞矣壯麗亦稱是寺成秀  
公來乞余記余之鄉先生王寵履吉嘗養病茲寺余得

其詩二卷詞翰皆驚絕因竊跡其瑰奇崇壇宛委咻窳  
之勝思一游目而未能嚮者似聞客言勝且泯泯矣詢  
之秀公寺今如故勝亦當如故秀公曰然嗟乎當天監  
之世冠達氏以人王之尊酷入人天之下果而吾吳郡  
又其左馮右扶緇黃之所皈嚮貨賄之所蘊隆蓋有非  
佛理不談非佛事不之者宜浮圖之盛至此也然而同  
秦之講座未徹而火輪即逐之其它臺城之內外今所  
按圖而得列於伽藍記者十復有幾而瀕海一蘭若遇



圮轉振魔所不能妬而社所不同改豈護法諸天厚小  
而薄於大哉夫圮者數也振者人也或者曰人亦數也  
夫山河大地惟心識所造而可盡誨之數也耶且而師  
之有感乎圮之緩促也以為致力之固與不固也此非  
獨一刹言蓋哲於說淨業者矣二比丘勉乎哉以此功  
德而不住相則無漏以此深心而奉塵刹則大報恩不  
然而欲以余言而為寺重以寺之復而為若重非所知  
也

# 高公橋記

海陽之舊治曰古城故越國公所築至唐始徙而西十里五流之所匯曰漸江襟邑而東古城之山寔綰轂其口則車馬之所繇道也編葦木而渡卒然遇水潦則蕩無跡士女淹日磧坐遙相喚而已徽太守濟陽高公時用郎高第來治郡暮年政和而歲登乃以間案行屬邑疾苦而得其狀歎曰民病涉矣即太守有不腆之輦一安能如公孫大夫僕僕晨夕且所濟之幾何屬其令曾

侯乾亨曰為我謀于邑薦紳三老文學卒吏咸報曰公為邑行李計意甚善雖然是必石而後梁度其費為金者萬有奇曾令內憂曰藉之官官帑之寸鏹尺幣皆版大農矣且未可以一方之役而勤我民意者藉之豪乎有去古城而下流十里者豪一曰黃廷侃其人質直可義使也乃召而屬之曰是費且萬金生能為我損十之二以倡諸吏民乎廷侃慨然曰小人積歲月之贏以有此索而衣食之亡幾念有以散之貴得所耳一切請獨

任母以煩我父兄令大喜以報高公則亦大喜廷侃乃徙家其所僦工采石伐木經始於壬午之季秋至某年月而告成厥脩八百武廣四軌崇九仞其堅若礪矢矯若崇虹穹窿若三成之嶺度者足相踵目相矚而懽呼相屬也後令丁戾某至蓋時時為鼓舞焉既成以報高公復大喜援詔例子廷侃爵一級得公乘而會少司馬汪伯玉氏來遊其地而壯之名之曰古城石梁而紀廷侃義舉甚詳廷侃踟躕不安曰奈何以一賈人子而擅

賢士大夫名且是梁也守高公之指也邑曾侯之所許而丁侯之所時誨也余敢奸之走其從弟諸生廷直留京謁大宗伯袁抑之氏而叩之袁公曰若所不敢者善為大書勒於石曰高公橋已復走其友諸生吳子玉於吳謁余而請記余夙善吳子文而義廷侃不獲辭按司馬所記稱石梁今言橋者何孜孜爾雅梁莫大於漢梁郭景純注梁即橋也又曰梁石橋也石杠謂之倚亦曰橋也其獨言高公者何示尊也亦志所自也昔漢有崔

雍州者治渭水而獲巨木數百章取而橋之百姓以為  
便遂目之曰崔公橋而他若召伯之埭鄭國之渠白公  
蘇公之堤皆因其人而不之改蓋所著於去後之思毋  
忘其樂利也然李冰之橋於蜀蔡襄之橋於閩其巧奪  
造化而功蔽全鎮僅被之以七星萬安之名而二公若  
不與者非百姓之忘而二公之讓也雖然其血食於彼  
地者今猶未已高公以一念之仁能發長者誼不愛萬  
金之橐以成千百世之業然至廷侃之為誼功成而不

有其名以歸之高公則又難也母亦高公之德政居平有淪浹於膚髓者能使人躍然而子來也耶吾甚嘉之故記以示後之為人上者必好仁如高公為人下者必好義而終事如廷侃而後可高公濟陽人曾令吉水人丁令武昌人先後成進士有聲

重建瓦官寺祝釐聖壽記

瓦官寺者初自晉興寧中地在金陵秦淮之陽右所稱銅官鹽官之類是也寺故有三寶一為師子國所貢玉

如來像一為顧長康所繪維摩詰天女一為戴顓所損  
臂胛塑像至宋孝武時復以三十二金像益之遂粲然  
為四百八十之冠而是時有傑閣踞其後壯麗無偶以  
久故歌其西南角至唐開元九年七月大風起龍江蕩  
秦淮而上歌者復正寺僧神之龕其事於壁南唐昇元  
中以紀年為閣名而至宋開寶八年十一月金陵下兵  
燹凌之閣遂為燼而神之者猶曰海舶自東來夕見空  
中有光擁一閣而去隱隱聞梵唄鐘磬音若所稱同泰



浮圖者距其剎為歲五百八十餘蓋自是一燬而不復  
紹興中一論師於閣址旁百武復建閣曰盧舍耶高可  
七丈逾於瓦官之舊久之復中兵燹蓋併其所謂寺者  
始而稱崇勝壇繼而蕩為免葵燕麥之場而漸不可識  
徒令人增愜於法汰道林智顗之書劉丹陽王長史何  
次道阮思曠之緒論與李供奉之詩歌想像暮煙秋色  
於冶城大桁之間而已至明而入魏國上公之圃為鳳  
凰臺西隙地正德中有神僧過而膜拜焉謂為佛土授

記居民以去自是時時夜見光怪久之山西比丘覺恒  
者得法於淨土寺法師成亮已受記伏牛印空師繇少  
林轉歷南海至金陵魏之先公禮之為築精蘭以舍直  
其地父老稍稍為言光恠狀且云故瓦官寺址也廢井  
在焉跡而掘之有石刻天王像精甚識其陰曰昇元於  
是魏公益慨然自稱檀越頗發其藏鏹以成殿堂門廡  
庖湍客寮寔庫之屬華覲窈窕深中宏外經像整麗咸  
得其所而它所未備者恒公盡以三衣中食之羨足之

其後得金陵悟迎為弟子授之衣鉢而脫身走伏牛立而化迎公代之以精勤為法事以慈憫攝衆心大德具壽紛綸而萃羯磨講誦各安其職今魏公復用三天竺故事割其餘祿以供常住迎公既謀所以永永茲剎者祈之宰官汪先生伯玉俾為文紀之詳且覈矣居復念魏公世世為天子肺腑其履端履長萬壽之祝歲不過三且與百辟共事亡以專昕旦而諸苾芻托國主之護持亡兵革灾沴它厲以礙薰脩蓋未嘗食息而忘祝釐

走其徒二人謁世貞申為之記世貞故嘗讀遠法師前  
後論辨沙門不敬王者又百丈初立道場不立佛像以  
為卓識及見宋元之季宗師上講堂必先拈香而誦佛  
祝聖心竊以為疑其後復攷我世尊所行化之國非一  
王其王嚴事之不啻大梵帝釋而世尊之所以獎翊而  
庇佑之者亦不一二已也當此之時重在法王則人王  
賴法王以有其國世尊滅大迦葉阿難陀繼之人王與  
法王交重則兩相事迨其既也大法流而震旦重在人

王則法王賴人王以衍其教是故遠法師之論有所絀而百丈之見不能以偏用若是乎頌佛祝聖之不可已也諸比丘可謂能得其意者已若魏公世臣與宗社共休其昕旦加額願天子萬壽無疆又何庸贅哉故不辭與伯玉齒而為之記

小崑山讀書處記

崑山為吳屬邑中有山巋然以是得號故老云此馬鞍山也去華亭之西南十八里乃真為崑山今以崑山之

為邑故辱之曰小崑山是故婁虞陸遜之孫機雲所讀書處也然其大寶不能當馬鞍之半而又以地偏而水迂不為使輟游槩之所便習今年丙戌春友生徐孟孺陳仲醇游焉其趾蝕民居逶迤而上至半嶺而有佳木美箭之屬其勝始露更上數十武為石塔而郡之所誇九峰三泖者悉歸焉二子樂之挾塔僧而下與偕東過一庄墅楚楚僧曰是鄉老陳姓之室也業且售之無為主者問其直止可三十金二子適有某甲饋欲返其橐

而不可曰士衡不云乎髣髴谷水陽婉嬾崑山陰即此地也夫誦其詩不知其人可乎請售其地而祠之置丙舍以歲時賡讀書其中太原王辰玉聞而欣然為助其不給乃稍稍更飭之其居前俯清流左右壘黃石為短垣其陽獨闕樹槿藩之曰槿垣中有堂三楹頗整靚斑竹千竿擁之蒼翠襲几席曰湘玉堂側室蕉數本輔之以長夏弄碧可念曰蕉室中奉二陸主又曰二陸香火處有石刻曇陽子古篆心經梓龐居士集皮馬祠之後

左偏石岩高可數十丈空濶瑰竒石楠十餘樹覆之石  
皆作紫紺色曰赭石壑竹後小池蜿蜒至屋角而盡蘋  
藻空明儵魚出沒曰蚪斗灣出槿藩門則所謂清流者  
其淺可以菱菱熟則紅如夕霞曰紅菱渡渡之東板橋  
橫焉左右多垂楊曰楊柳橋稍折而東堰水一區方廣  
三畝馴鶴浴之沒不能蹕曰洗鶴溪斑竹之餘勢上延  
山椒芟其繁者得地而亭曰花麓亭湘玉堂之陽與祠  
之左為廣場且六畝二子念欲雜時諸花卉實之而索



裝恥矣乃自草疏請諸戚執曰為我塗澤此石者花為  
我暎帶此水者花為我挽客趾者花為我娛二陸先生  
之靈者花即捐花而惠之百不為多一不為少稱意而  
已俟花成當目之曰乞花塲塲之右方有井冽而甘亦  
前目之曰澆花井而屬山人為記夫以二子之所偶遊  
而得真崑山以崑山而得二陸之遺踪於千載之後起  
哀魄腐骨而聲施之久絕之血膚一噓而熒然復覩香  
火茲非文士厚幸哉雖然以二陸才不能保首陽之操

而失身於讐國又不能沈幾辨勢而失身於仇王晉陽  
之甲士衝戎首卒不勝而以讒死士龍狡狡差稱循吏  
然於大節竟胡當也二子勉乎哉即執文一技耳能使  
千載之後若新而況不但為執文者又當何如也於是  
呼筆紀之而致花十種於場

東海游記

歲丙戌之孟夏汪司馬伯玉挾其二仲與客龍徐兩司  
理栖我弇中弇中之勝窮思有以廣之者將東游於海

而海濱之新城其帥曰張君君適有信相訊間語之則欣然具人舟迎而二仲之一某病嬾而驕不欲往遂以司馬司理走吳門余意殊邑邑謂張使語而主吾自與高陽之客來不煩彼司馬也期之十日暮而泊新城九日大風雨時客當往者龍溪令沈君太學生曹子諸子潘子林子及從子公藝少兒士駿侍焉相顧而疑如風雨何余語之曰夫與一虞人期不風雨改也而奈何使我食言於張帥也夜夢祀東海若者拜之則為起已而

避從右廡入追拜之則答而加恭晨起雨猶淅淫不止  
賈勇治二舟而發太學徐子適過我要與偕既發雨稍  
間已復時作風調調刁刁艦首與潮鬪甚艱行可六十  
里而暝色見矣然以客之勇於酒也飛白捲波網鮮佐  
之雜以諧謔殊不恨緩張帥輕舟來迓以醉卧辭夜息  
蓬底不聞滴瀝則已幸矣質明張帥復來訪已偕沈君  
報訪時雲陰漸解駁俄而盡捲輕颼柔調若有而無張  
帥乃盡要客登福之餘皇蓋海舶之最大者而徐子為

其友所妬給以它事喚舫舩馳而去之諸君飯畢易沙之蒙艫取其輕而便操也鼓舵從退潮出荊陽在天金波溶溶下上一色戈舩雜沓旌旗搖曳鼓吹四奏炮礮陵厲其東為崇明百里而近始望之僅一髮耳漸近則煙樹漸可辨唯南北杳渺出目眚外不可究詰俄而有若飛藿十餘颭浪來者頃之辨其為颿也戲謂張帥得非越棠舶乎以不揚波故來問聖人耶既則候汎之歸舩耳張帥乃部分之為魚麗以益我軍容左右翼而從

進潮入時日猶未崦嵫也而纖阿密乘之矣徙倚良久  
崦嵫之照盡而素光顯張帥仍布席於餘皇之背前後  
大小相望僂百艘艘樹二檣檣懸一燈若巨宿然與成  
象者爭耀街鼓初動清光瑩然凝碧萬頃黎園之長鬣  
者歌大江東去之疊羣興暴發不可遏則使童子擣漁  
陽摻於餘皇首而摘紅蕊使遞傳蕊至手而鼓歇巨羅  
在口矣客避花則怯競飲則勇循環無端與月終始既  
醉散去晨甫櫛張帥復來挽欲續未竟之歡而風蓬蓬

然掠耳矣余亦興盡固辭張帥以為勝事不可無紀請  
得一言之為寵光余竊惟海之為壯在於決潏浩漭黏  
霄無畔噓虹磷日齊沒汨出而其勝必自風濤賈之激  
天漢搖地軸長鯨毒蛟天吳紫鳳之恠倏忽閃尸變幻  
萬狀若玄虛思光之賦所稱者然後可以極其勢今之  
游也一葦不驚鉞尊晏如童子嘻笑長年鼯息此何異  
吾家一池沼亡論吾不文即文何以稱之雖然能極其  
勢者誰也即不幸而遠使貪商遘之將唬噉祈死之不

暇而暇與論文哉且余之觀於海者五此其最小者耳  
然而東南一大綰轂口也今吾與君從北而數其去而  
若雲之檣若霜雪之粳稻者勝國之所轉漕以給都會  
者也從南而數其來而若雲之檣若霜雪之戈鋌者先  
朝之所中倭而殘我邊徼者也其利與害懸殊然不能  
為無事一也今吾與君幸藉天子之威德而君又以兩  
伏波之略承之其危軫死士不以鬪憂而以飽嬉而吾  
草莽之臣亦獲一寓目焉至狎之以為池若沼惡可不



相慶幸知所自哉張帥曰固也余日臨海而得昨之游者歲不一二數將子之嘉夢是踐而余敢奸之請受以登石沈君名昌期曹子名益學潘子名燾皆吾太倉人林子名庭雲閩之晉江人徐子名益孫華亭人張帥名榜越之臨海人廉而卹士有文武才其再蒞戎也執政實賢之

先司馬祭贈聖綸碑陰記

嘉靖歲在庚申臣世貞之先臣某以直忤權相嚴用邊

隅小警絳吏議臣不孝不獲叩閤請代又不能從死地  
下覆盆飲血者久之為隆慶丁卯屬在鼎革始敢白見  
冤狀下太宰議太宰移大司馬大司寇復移左輔之臺  
使監司三報牘而後得昭雪還御史大夫官明年吳中  
之撫按督學憲臣合辭以旌卹請而河間之悍相有與  
吾地之故相閱者謂故相為市恩而宗伯信之遂報寢  
又入海賈謗其為朱中丞紆請者亦寢當是時臣方強  
起守浙藩懋懋乞休不許自是遷晉臬補楚臬以至入

長太僕撫鄖襄婁乞休又不許然以報寢未幾而貴相  
汰甚自詭以綜覈名實次且未敢更請而臣忽避言里  
居每一念至五內寸裂第有彈指歎息而已誠不敢萌  
它望久之臣以少司寇徵不幸被狗馬疾不克赴而弟  
懋起副閩臬私心欲屬以茲事而會其自臬而藩以賀  
萬壽道得南容臺佐乃勉具疏草千餘言俾至都下上  
之卒卒不果未幾吳中之按臣鍊偕撫臣元敬合疏陳  
言便宜八事其一事則復劇稱先臣之功巨而創深於

格當旌卹而朱中丞亦與焉事復下宗伯為請於上俱  
報可而先臣二品未滿考以甲冑勞獨得兩祭全葬恩  
至渥也臣母郁後先臣十年而捐館舍久侍窆窆臣乃  
敢以例請併祭而友人太子少傅錫爵見臣疏草而憫  
之稍為潤色以上事下宗伯既許臣母併祭復為移太  
宰具先臣橫草之勛得贈大司馬臣誠不知所從來驚  
忤逾望既拜祭及焚大司馬告黃竊錄諭辭二章告一  
章勒之貞珉以昭顯聖恩垂永永嗚呼先臣事世宗朝

繇小官不十歲而拜中執法然自是南捍倭北守薊委命鋒刃之林以身禦圍者又十年而中讒不免夫罪與賞並輕而功與罰偕重然之孤有胸無口者又九年而始一獲伸復中讒不與沾旌卹蓋又十八年而始有祭有葬有贈不特先臣墓木已拱而臣之髮縞齒墮去鬼無幾何矣其以讒中沮先臣者亡論麗辟與否然已燼盡漸滅不足置齒顧今上恩德隆天厚地靡可報塞而一時鄉衮臺臣明識高誼亦豈遂宜泯泯故略紀其

事及姓名於碑陰以志先臣之冤苦勞勩其抑之易而伸之難若此臣不孝不能為先臣請一旦之命而賴公卿大夫公議之力又若此為臣之後人者用歲時掃祭先隴頽仰龜螭捧誦綸綍洗滌肝膽砥礪士行以少酬君親執友之分誼於萬一臣旦夕從先臣以身薦螻蟻庶幾無憾哉

蛻龍亭記

當萬厯之某年吳興潘公時良以御史大夫督治河漕

淮北之功就而昉有事於淮之南築堤以捍河與湖水  
爭勝河不外溢則民不竟魚湖不內蕩則漕舟有所道  
而毋沾溺其工至艱巨而利甚博公之始下令鳩僝畚  
鍤雲集而高堰之下流為黃浦者最其衝也而最不受  
塞居恒舟楫過其地必出驚濤迅飈以敗之至是則東  
郡之薪與淇園之楫隨下隨漂而不可挽公乃先築高  
堰及為兩壩以斷其上游水不至則黃浦之根見而窟  
藪者皆不安一夕大風雨雷電摧拉若崩城池忽穴深

丈餘方廣二十八丈中有首骨一具若馬者舐之黏舌  
已而從居民所復得齒肉脰骨若干餘為商船所分取  
都水使者上事於公以為神公曰龍所蛻也我何與焉  
雖然隄之害去矣上於朝留其骨玉府蓋不日而隄果  
就公至是凡三治水矣功成而加太子少保入留都大  
司馬又入為大司寇以持法抗新貴人為所中罷歸田  
庶尹百司嘗為公屬者與宦游其地者咨嗟咏歌不啻  
河洛之思因即蛻骨之地亭焉而會河復決漕道不利



天子思公功即家仍故秩御史大夫治之余尋用考績  
抵淮而遇及都水使者某等目其事甚詳且屬余記之  
曰龍跡偶耳例之以陵谷事固不恒有而潘公之功不  
可朽得子之一言吾曹與子亦偕不朽予心諾之而未  
敢應也今年春乃始偕藩臬諸君子布幣而伸前請不  
佞竊聞之鱗介之中龍最為長而至神靈其潛見飛躍  
大而橫天小而藏芥變化叵測茲何以有蛻也夫惟蛻  
而後能神拾遺記有云方丈之東地方千里龍皮骨如

山阜布散百餘頃述異記亦云晉寧有龍葬洲大約亦如之蓋龍之始多蛟蜃鼉魚之類氣久而變則移質質久而蛻則成神然後受上帝之命宰百靈潤九有其蛻則釋氏所云靈骨之類耳第吾聞之傳志龍性淫而善怒多嗜當其怒之時則雖排山襄陵而有所必快當其淫與嗜之時則雖改服殊形而有所不顧豈其未蛻耶抑宿習然耶善乎潘公之言吾知水害之除而已不知其神也公今四奉天子命矣前後二十年南北數千里

即昌黎氏所稱南海之功固不能與公較細巨也攷漢武帝時穿洛引水以至商顏其下得龍首骨人主嫩之特錫名曰龍首渠而祠祀之今天子不名瑞潘公不名功而吾與諸賢略紀其事以備裨史當差更勝也諸賢姓字官秩里系具左

弇州續稿卷六十二